

Punca Islam tidak bersatu

B.H. 2 SAUG 1983

PETALING JAYA, Selasa — Umat Islam di seluruh dunia hari ini tidak mengamalkan kehidupan cara Islam menyebabkan mereka tidak bersatu, berperang sesama sendiri, lemah, mundur dan bergantung keselamatan mereka kepada orang lain, kata Datuk Seri Dr Mahathir Mohamad.

Perdana Menteri berkata, umat Islam di serata dunia ditindas tanpa pembelaan daripada negara atau pemimpin yang berupaya menyekatnya, membela keadilan serta memulihkan keamanan.

“Tidak ada negara Islam yang menjadi kuasa besar. Apatah lagi negara Islam yang menguasai ilmu, teknologi dan kepakaran organisasi.

“Oleh itu, Islam menekankan keperluan ilmu dan kepakaran di bidang terbabit yang boleh memperkukuh dan melindungi ummah,” katanya.

Dr Mahathir berkata demikian di majlis ulang tahun ke-10 Universiti Islam Antarabangsa (UIA), di sini hari ini. Hadir sama ialah Menteri Kewangan, Datuk Seri Anwar Ibrahim, selaku Presiden UIA dan Rektor UIA, Datuk Dr Abdulhamid A Abusulayman.

Perdana Menteri berkata, kegagalan mempelajari dan menguasai ilmu serta kepakaran akan mendedahkan umat Islam kepada bahaya kehilangan agama mereka apabila mereka dibelenggu kemiskinan ilmu.